



FAMPITAM-BAOVAO

Fanambarana mikasika ny andraikitra sahanin'ny vadin'ny Filohan'ny Repoblika

Ny Fiadidiana ny Repoblika'i Madagasikara dia mitondra ho fantatry ny besinimaro fanampim-panazavana mikasika ny andraikitra sahanin'ny vadin'ny Filohan'ny Repoblika:

- Manamafy ny fandalàny ny soatoavina sy ny fotokevitra ifaharan'ny fiarahamonina malagasy dia ny "Fitiavana, ny Fihavanana, ny Fifanajana, ary ny Fitandroana ny aina" ny vadin'ny Filohan'ny Repoblika,
- Mahatsapa ny andraikitra goavana tokony ho raisin'ny vehivavy mba hisian'ny fampiraisana sy ny filaminana ara-tsosialy, ary mba ahatongavana any amin'ny fampandrosoana ara-toekarena sy ny fanabeazana,
- Resy lahatra ny amin'ny tokony hikatsahana fiainana tsara kokoa ho an'ny zaza amam-behivavy, mba hiantohana ho avy mamiratra kokoa,
- Mahatsapa ny maha-zava-dehibe ny firotsahana lalindalina kokoa amin'ny fikatsahana ny mahasoa ny Vahoaka malagasy,

Noho izany indrindra dia manipika ny fankatoavany ireto foto-kevitra goavana manaraka ireto Ramatoa Rajoelina Razakandisa Mialy, vadin'ny Filoham-pirenena:

1. Ny Filohan'ny Repoblika no tompon'antoka voalohany amin'ny fampizorana araka ny tokony ho izy ny fiainam-pirenena. Ny andraikitra ny vadiny dia ny manohana azy amin'ny fanatanterahany io asa masina io, ka miara-dia aminy amin'ireo fivoahany ofisialy izay ataony.
2. Ho fanajàna tahaka ny anakandriamaso ireo soatoavina repoblikana lalain'ny fanjakana, ny vadin'ny Filohan'ny Repoblika dia tsy mitsabaka mihitsy, na amin'ny fomba ahoana na amin'ny fomba ahoana, amin'ny fitantanan-draharaham-panjakana.
3. Tsy manao tsindry bokotra amina tompon'andraikim-panjakana na amin'ny fitantanan-draharaham-panjakana amin'ny ankapobeny.
4. Ny vadin'ny Filohan'ny Repoblika dia tsy mandray karama na tambin-karama, tsy manana kabinetra ary tsy misy sora-bola natokana ho azy ao anatin'ny teti-bolam-panjakana. Mpiara-miasa mpanampy iray kosa no omen'ny fanjakana azy handrindra ny fandaharam-potoanany sy hiaraka aminy amin'ireo dia izay ataony.

Eo anatrehan'izany indrindra dia manome toky Ramatoa Rajoelina Razakandisa Mialy, vadin'ny Filohan'ny Repoblika, fa ao anatin'ny asa sy andraikitra izay hosahaniny dia hilofo bebe kokoa izy:

- Hanohy hiasa mandrakariva hanampy ny firenena sy ny vahoaka amin'ny alalan'ny Fikambanana izay tarihany.
- Hametraka ho laharam-pahamehana ary hiady manokana amin'ny herisetra atao amin'ny vehivavy sy ny ankizy, ho fitandroana ny zon'olombelona, ny fahamendrehana sy ny soatoavina maha-olona.
- Hiaro ny tontolo iainana amin'ny alalan'ny fandaharan'asan'ny sehatra PAESFA izay tarihany, mba ho fanatsarana ny fiainana sy ny fahasalaman'ny tokantrano tsirairay.
- Izao fanazavana etoana izao dia nentina amin'ny anaran'ny mazava sy mangarahara momba ny tena tokony ho andraikitra ny Vadin'ny Filohan'ny Repoblika eo amin'ny fiainam-pirenena.

Natao teto Antananarivo, androany 06 febroary 2019

Ny talen'ny Kabinetran'ny Fiadidiana ny Repoblikan'i Madagasikara